

Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organisacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Robert Arends

AVP/FUTURO ta contra discriminacion di SVb-Aruba of no?

E discriminacion cu SVb-ARUBA ta aplica ta cu SVb-ARUBA ta paga un "pensionado casa cu ta cobra pensioen di biehes" MENOS pensioen di biehes cu SVb-ARUBA ta paga "un pensionado no-casa".

PERO ora SVb-ARUBA ta cobra prima pa cubri pensioen di biehes, SVb-ARUBA ta cobra TUR hende (casa y no-casa) e mesun prima! SVb-ARUBA no ta cobra un hende "casa" menos prima cu un hende "no-casa". Pakico anto SVb ARUBA ta

paga un hende casa MENOS pensioen di biehes cu un hende no-casa? AVP/FUTURO lo sigui laga SVb-ARUBA discrimina hende na Aruba? Ban stop cu discriminacion!



Reseña skirbi pa Joe Fortin

'Di Carigueña pa Santa Clara': Buki nobo di autor Jossy Tromp (Parti 1)



Despues di un total di 5 buki cu storianan cortico: Cetilalma y otro cuentanan Arubiano (1988), E bi-ento di atardi y otro cuentanan Arubiano (1998), Un anochi y otro cuentanan Arubiano (2005), E bar-bulet preto y otro cuentanan Arubiano (2007), 13 Cuenta (2011) y Tera di Waltaca (2015), awo Jossy Tromp a publica su prome novela, **Di Carigueña pa Santa Clara** (2025). Den e ramo di literatura, Tromp a publica tambe dos tomo di poesia: **Gabilan** (2009) y **Na Caminda** (2015) y un obra di teatro: **Camind'i Cruz** (2015).

Despues di lesa e storianan cortico di Jossy Tromp, ta keda un sorpresa con e autor lo manifesta su mes como novelista di un buki di 296 pagina. Con e lo uza e elementonan cu e ta conoci p'e den su storianan, den un buki extenso y lo por reconoce su estilo di skirbi, su fabricacion di lo fantastico, surrealista y misterioso den un relato cu ta cubri alrededor di 41 aña den Carigueña, un pais ficticio?

E novela ta conta e storia di dos ruman morochu, Pietro

y Jacobo, cu ta forma parti di un famia elitario di Carigueña, un metropolis ciudad estado. Nan mama ta Miriam-Celestia y nan tata Pedro Calisto Gonzales, medico y poeta, kende a muri tragicamente den un accidente misterioso tempo cu e rumannan tabata chikito. Nan a crece hunto y desde nan adolescencia ta cera conoci cu e rumannan cu ta diferencia no solamente den apariencia, sino tambe den caracter. Jacobo ta e idealista cu gusta lesa, mientras cu Pietro ta esun mas rigido y robusto cu desde mucha tabata tin interes den politica. Despues di nan scol secundario, Pietro a bay studia den exterior, a gradua y a regresa su pais, mientras cu Jacobo a keda na Carigueña. Ora Pietro a regresa, el a bin haya su mama, Miriam-Celestia, den fase terminal di su bida a causa di cancer. Jacobo a cay den adiccion di droga y tabata biba riba caya.


E bida di e morochu a coy direccion contrario pasobra Jacobo tabata un choller cu ideanan anarkista, mientras cu Pietro a drenta den politica y a bira e lider maximo di nan pais.

E motibo pakico e rumanan a tuma direccion totalmente diferente den bida, tin di haber cu nan caracter, pero tambe cu e diferente aspectonan cu a afecta nan bida. Prome cu nan mama Miriam-Celestia a fayece, el a confesa nan un secreto grandi cu semper e tabatin scondi pa e rumannan morochu. E revelacion di e secreto aki ta cambia nan di tur for-

ma y ademas poco poco mas secreto scur di nan pasado ta yega na e superficie di nan existencia. E secreto di nan mama a revela djis un parti so di nan bida, ya cu despues di su morto, un otro personahe muhe Flora Catarina Alvaros miho conoci como Maria Aurora, ta revela mas secreto y aspectonan horroroso di nan bida. Ken e señora aki ta y pakico e tin asina hopi impacto den e bida di e morochu? E secreto cu e ta conta tin como consecuencia cu Jacobo ta dicidi di tuma venganza riba e carnicero Bernardo Robaldo, Shon Bebe y tata di nan bon amigo di hubentud Lorenzo. Despues Jacobo mes ta bira victima di un acto di violencia cu consecuencianan fatal, pero ken ta responsabel pa agresion aki y cu cua motibo? Y con su propio ruman Pietro ta involucra den e caso aki?

Esaki no ta tur e secretonan di maldad cu ta keda revela, pasobra a mayornan di e morochu tambe tin nan parti scur den bida y manera un puzzel, cada pida di e imagen total ta conecta cu otro. Asina bo ta haya sa kico a pasa den realidad cu e tata di e morochu, esta cu Pedro Calisto Gonzales. El a muri berdad a causa di un accidente? Y e tabata e tata berdadero di e rumannan morochu?

Banda di e storia di e morochu, bo tin otro storianan cu ta cana paralelo cu esun principal y di tal manera bo ta haya sa mas di Hortencio Florencio, un narcista autocratico y megalomano cu a goberna dictatorialmente



riba su pueblo den pasado y cu awo, despues di su morto, ta bin bek den e bida di e bibonan pa sigui cu su plan di corrupcion. Kico e amigo di cas di e morochu y posibel amante di nan mama Miriam-Celestia, dokter Augusto Romero, tin di haber cu e personahe misterioso aki y

kico su meta ta relaciona cu Pietro? Mientras cu Pietro, mirando con cada bes su bida perfecto ta keda cay den otro y ta consciente di tur e menasanan cu ta bin door di redonan relaciona cu e bida scur di su famia, ta tuma decisionnan drastico y fatal.